

Taitus

Taitus hitte Pol beleŋ asaŋ kayyiŋ

1 ¹Taitus, nebe Pol, Al Kurunyen meten al, irde Yesu Kristuyen mere basan al aposel. Nebe alya bereya Al Kurun beleŋ basaŋa yirtiŋ mar goyen faraŋ yurde himeke Al Kurun niŋ hekkeŋ nurde hinayiŋ yen aposel heŋ meten teŋ hime gago. Irde Al Kurun palap irtek mata gote mere fudinde saba yird yird meten goke manaŋ aposel heŋ meten teŋ hime.

²Irde Al Kurunya hugineŋ heŋ heŋ goke doyaŋ heŋ himyen geb, go hende huwarde meten goyen teŋ himyen. Hugineŋ heŋ heŋ gobe usi ma teŋ hiyen al Al Kurun gore nanŋiŋya megeŋya forok ma yekeya detmiŋ kura neŋ duneŋ yen biŋa tiyyiŋ go goyen. ³Ningeb nalu bikkeŋ kiryiŋ goyen forok yekeb meten marmiŋ hulyaŋ yirke meremiŋ tagalde hikeb bikkeŋ biŋa tiyyiŋ goyen kawan forok yiriŋ. Ne wor Dumulgaŋ teŋ teŋ Alniniŋ Al Kurun gore meten go tiya ninkeb meremiŋ gago tagalde tukuŋ hime.

⁴Munaŋ Taitus, gebe ne beleŋ Al Kurun niŋ momoŋ girmekeb ne timiriŋ gwahade goyen po, ge wor yen ge dufayge saŋiŋ irariŋ. Ningeb goke teŋ gebe urne wor po yara nurde gunen hime.

Ningeb Adoniniŋ Al Kurunya Dumulgaŋ teŋ teŋ Alniniŋ Yesu Kristuya beleŋ buniŋen girde igiŋ igiŋ girde bege isikamke igiŋ hiwoŋ yen gusuŋaŋ yirde himyen.

Yesuyen alya bereya sios gote doyaŋ mar igiŋ kura basaŋa yirayiŋ

⁵Be, ne beleŋ Krit motmotde gubul teŋ wamiriŋ gobe meten kura pasi ma irdeya wamiriŋ goyen ge beleŋ gab pasi irayiŋ yenbe gogo gubul teŋ wamiriŋ. Irde ginmiriŋ gwahade po, naŋa goyen bana niŋ taun kurar mat kurar kuŋbe taun goyenter niŋ Yesuyen alya bereya bana al kura basaŋa yirde yen goyen doyaŋ yird yird mar yirayiŋ yen nurdeb gogo gubul timiriŋ. ⁶Yesuyen alya bereya doyaŋ yird yird mar goyen basaŋa yire yenbe matamiŋ keŋkela yeneŋ ga basaŋa yirayiŋ. Matamiŋbe gahade

hinayin: al gobe ulinde merem mon, irde bere yunkuren po yawartin mar. Irde dirnen wenbe Al Kurun nin dufaymin taren irtin, irde dapna duwi yara heke merere yukutin ma hen milinya naninyat mere kenkela gama irde hinayin. ⁷Be, Yesuyen alya bereyat doyan marbe Al Kurun belej po metenne tinayin yen basiya yirtin. Ningeb go mar gobe ulinde merem mon hinayin, yingen ge turun turun ma ten hinayin, aranen bearar ma ten hinayin, kukuwa fe nene kukuwa hen hen mata ma ten hinayin, det kurun al kwep kwep ma yirde hinayin, irde al mali ma gasa yirde hinayin. Irdeb usi matare al kurate hora ma yade hinayin. ⁸Gwaha titnenbe al wake gargar yirde hinayin, mata igin ten tenya igin hen henya nin amanen nurde hinayin, ulinde po aman hetek mata goyen epte fole irtek hinayin, irde Al Kurun dilinde al huwak wukken wor po hinayin. Irde metenminbe kumhaka ma hen kenkela po meten ten hinayin. ⁹Yenbe deyya belej saba yirtin mere fudinde hekken nurtek goyen taren po tanarde hinayin. Gogab saba fudinde gore po al hoyan igin saba yirdeb sanin hen hen ge faran yurde hinayin. Irdeb al kura saba fudinde goyen asogo irde hinayin mar goyen igin bebak yirke, “Fudinde, bulun ten hite,” yen nurnayin.

¹⁰Be, ga ginen hime gabe Krit motmotde gorbe al budam Al Kurun asogo irdeb merebe min minmon ten al usi yirde hanjen geb, gago ginen hime. Go ten hanjen mar goyen bulun wor pobe Yesu nurd untin gega Yuda marte tikula gama irde guba yen yen mata ten hanjen gogo. ¹¹Go mar gobe det goke al saba yirtek mon goyen hora yad yad nin po nurdeb Al Kurunyen dirnen wen usi saba yirde dufaymin bulun yirde hanjen. Ningeb usi saba mar goyen utan yirkeb mata go bada po henayin. ¹²Usi matamin goke tenbe yingen al kura saba mar karkuwan yen nurde yunen hanjen mar goyen kuramin kura belej mere kura gahade tiyyin: “Krit motmotde nin marbe huginen usi po ten hanjen, irde al gasa yirde bulun po yirde hanjen, irde kumhaka po hen dulan po ten hanjen,” yirin. ¹³Al gore mere tiyyin gobe fudinde. Ningeb usi saba mar goyen kun yinen ten saba yirayin. Gogab Yesu nin dufay taren ird ird saba fudinde goyen po tanardeb ¹⁴Yuda marte tikula ma gama irnayin. Irde Al Kurunyen mere fudinde pel iramin mar gote saba gobe yubul po tinayin.

¹⁵Fudinde, al kura Al Kurun belej wukken iryen al gobe Al Kurun dilinde tikin minmon geb mata dahade kura ten hiyen kurun gobe wukken ala po hiyen. Goyenbe al kura binde dufay bulun po kerde Al Kurun nin dufaymin taren ma irde hiyen albe dufayminya binyabe bulun hitin geb, Al Kurun dilinde al gobe wukken mon, irde yen belej mata daha kura ten hiyen kurun gobe tikin minyan ala po hiyen. ¹⁶Go mar gobe yingen ge yen, “Nenbe Al Kurun nurd unen hite,” yen han gega, matamin belenbe Al Kurun harhok unen han yen yentek. Gwahade mar gobe Al Kurun belej yentek ma irde hiyen mata go po ten hanjen, irde meremin pel irde mata igin kura titek ma hanjen.

Yesuyen alya bereya beleŋ gama irtek mata

2 ¹Be, gebe Yesu niŋ yitiŋ mere gote saba igiŋ goyen gor niŋ Yesuyen alya bereya saba yirde hayiŋ. ²Al parguwakbe gahade saba yirde hayiŋ: araŋeŋ bearar ma teŋ hinayiŋ, al beleŋ palap yirtek mata po teŋ hinayiŋ, uliŋde po amaŋ hetek dufay fole irde hinayiŋ. Yeŋbe Yesu niŋ dufay saŋiŋ ird ird gote saba fudinde po gama irde hinayiŋ. Irde al hoyan niŋ amaŋeŋ nurd yuneŋ hinayiŋ. Irdeb kanduk yeneŋ hinayiŋ gega, mukku ma teŋ goya goya tareŋ po hinayiŋ.

³Gwahade goyen po, bere parguwak wor saba yirde hike alya bereya hoyan beleŋ palap yirtek mata po teŋ hinayiŋ. Irde mere buluŋ mat ma teŋ hinayiŋ, kukuwa fe ug po ma nen hinayiŋ. Gwaha titŋeŋbe mata igiŋ po ga diriŋ saba yirde hinayiŋ. ⁴Gwaha teŋ hinayiŋbe bere hoyan yeŋ kamekkeŋ goyen igiŋ saba yirde hike uŋya goya diriŋeŋ weŋya goyen biŋde mat amaŋeŋ nurd yuneŋ hinayiŋ. ⁵Irdeb uliŋde amaŋ hetek dufay fole irde hinayiŋ. Matamiŋya dufayminiŋyabe Al Kurun diliŋde wukkeŋ po hinayiŋ, irde yamiŋyaŋ meten tareŋ po teŋ hinayiŋ. Irde alya bereya igiŋ igiŋ yirde hinayiŋ, uŋ yagot mere nurde gama irde hinayiŋ. Gogab matamiŋ goke al kura beleŋ Al Kurunyen mere niŋ buluŋ mat ma tagalde hinayiŋ.

⁶Be, gwahade goyen po, al foŋeŋ wor uliŋde amaŋ hetek dufay fole ird ird niŋ saŋiŋ henaŋ yeŋ faraŋ yurde hayiŋ. ⁷Irdeb mereya mataya teŋ hayiŋ kurun gobe igiŋ mat po teŋ hayiŋ. Irkeb al foŋeŋ gore ge mata teŋ hayiŋ go yeneŋ goyen po gama yirde hinayiŋ. Irde al saba yirde heŋyabe hende hendem ma saba yirde hayiŋ, irde nanosak hende ma saba yirde hayiŋ. ⁸Irde merebe huwak mat po teŋ hayiŋ. Irkeb al beleŋ mere kura tiyayiŋ goke epte ma ulger merem yaŋ girnayiŋ. Gogab asogo girde haŋ mar beleŋ gwaha mat kura neŋ gayen ulniniŋde merem yaŋ dirtek ma heŋbe yiŋgeŋ po ga memya henayiŋ.

⁹Be, al kura al kurate yufukde heŋ muruŋgem moŋ duliŋ meten teŋ haŋ marbe doyaŋ marmiŋ beleŋ yineŋ hinayiŋ kurun goyen nurde gama irde hinayiŋ yeŋ saba yirde hayiŋ. Meten mar gobe doyaŋ marmiŋ amaŋ hetek mat meten teŋ hinayiŋ. Irde gwahade gwahade tinayiŋ yinkeb uker ma yirde hinayiŋ. ¹⁰Irdeb doyaŋ marmiŋde det kawe ma teŋ hinayiŋ. Gwaha titŋeŋbe doyaŋ marmiŋ beleŋ, “Meten marniniŋbe igiŋ,” yeŋ hekkeŋ wor po nurd duntek mata po teŋ hinayiŋ. Gogab al beleŋ mel gote mata kurun goyen yeneŋbe Al Kurun neŋ Dumulgaŋ teŋ teŋ Al niŋ yitiŋ saba goke buluŋeŋ ma nurdeb mere goyen nurtek yiryen.

¹¹Be, ga gineŋ hime gabe Al Kurun beleŋ alya bereya buniŋeŋ yirde igiŋ igiŋ yirde yumulgaŋ tiye yeŋbe Yesu teŋ kerke al megen haŋ kurun gake wayyiŋ geb, gago gineŋ hime. ¹²⁻¹³Neŋbe Al Kurun beleŋ buniŋeŋ dirde igiŋ igiŋ diriŋeŋ goyen nurdeb saba kura titiŋ. Gobe gahade: Al

Kurun tarenmin hende wor po goya Dumulgan ten ten Al Yesu Kristuyabe degen turun yan wayiryen. Ningeb nenbe goyen goke doyan hen hite. Irkeb doyan hen hite goke Al Kurun belen guram dirde taren dirde hi. Ningeb doyan hen yabe Al Kurun palap ma irtek mataya ulnininde po aman hetek dufayya gobe pel po yirtek. Irdeb ulnininde aman hetek dufay fole irde hitek, irde mata huwak po ten hitek, irde Al Kurun palap irtek mata po ten hitek. ¹⁴Munan Yesu Kristu gobe nen gayen mata bulun kurun goyen bana mat dad sina diryin. Irdeb yende alya bereya po dirde Al Kurun dilinde wukken dirde mata igin ten hitek dufay po dunyin. Yenbe nen gayen gwaha dire yenbe gogo nende gasun ten kamyin.

¹⁵Be, saba girhem kurun gabe al gwaha mat saba yirde hayin yen saba girde hime. Gebe Yesuyen alya bereya gor han gote doyan al geb, go hende sanin huwardeb mel gore saba gayen kenkela gama ird ird nin dufaymin taren irde hayin. Munan saba go pel irde han marbe kun kimin mat po bulunmin goyen goke yinen ten utan yirde hayin. Irde yubul tike sabage goyen nurde wasak ma ten hinayin.

3 ¹Irdeb tiyunminde nin doyan marya doyan mar karkuwan yat yufukde hen bitinde mat meremin nurd nurd nin sopte bebak yirayin. Irde mata igin ten ten nin gitik ten ga hinayin yen bebak yirayin. ²Mel gobe al kura mere bulun mat ma yirde hinayin, al hoyanja awalikde hinayin, al hoyan kurun goyen igin nurd yuntin ala ten hinayin, irde al dilin mar yingen ge turun ten ten mata ma po ten hinayin.

³Bikkenbe nen wor Al Kurun ma nurd unenbe kukuwa po hen hinhet. Irde meremin ma gama irde hinhet geb, megen nin mata bulun ten ulnininde aman hen hen dufay kurayen kurayen gore usi dirke gote yufukde po hen go po gama yirde hinhet. Gwahade geb nenbe mata bulun ten hinhet, irde kadninin igin mat hike yenenbe dani nen gwahade mon yen nurde hinhet irde kadom asogo gird ten hinhet.

⁴Goyenpoga Dumulgan ten ten Alninin Al Kurun belen igin igin dirde bubulkunne wor po yen nurde dunyin goyen kawan forok iryin. ⁵Irdeb nen gayen dumulgan tiyyin. Dumulgan tiyyin gobe nen belen mata huwak kura titekeb goke ma dumulgan tiyyin. Nen ge buninen nurde dumulgan tiyyin. Yen belen dumulgan tiye yenbe mata buluninin halde dunyin. Irkeb halde dunyin gobe Holi Spirit belen sopte kawan hitin yara dirde al gergen diryin. ⁶Dumulgan ten ten Al Yesu Kristu belen dumulgan tikeb gogo Al Kurun belen Holi Spirit dunkeb katenbe taren wor po meten ten hiyen. ⁷Gogab Al Kurun belen buninen dirde igin igin dirde al huwak dinyen, irde yenna huginen hen hen gobe nende hiyyen. Fudinde, Al Kurunya huginen hen hen gobe nen belen goyen goke po doyan hen hityen. ⁸Ga ginhem gabe fudinde ginhem geb, ge wor Al Kurun nin dufaymin sanin irtin mar geya han goyen mere gayen taren po momon yirde hayin. Irkeb mel gobe mata igin ten ten nin kurut wor po

yeŋ hinayiŋ. Gwaha teŋ hinayiŋbe igiŋ wor po, irde go teŋ hinayiŋ goreb al budam wor po faran yuryeŋ.

⁹Irdeb mere miŋ miŋmoŋ goke kadam mohonđe teŋ hinayiŋ gobe kukuwamŋeŋ geb, gwaha ma teŋ hayiŋ. Irde mel gore yiŋgeŋde tikula gama irde tagalde hanŋyen goyen gebe gwaha ma teŋ hayiŋ. Irde dufaymiŋ hoyan hoyan goke teŋ geya kadam mohonđe ma teŋ hinayiŋ. Irde Moseyen saba goke kadam mohonđe ma teŋ hayiŋ. Mata gwahade gobe bulun geb, gore kura faran ma duryeŋ. Niŋgeb mata goyen ma teŋ hayiŋ. ¹⁰Irde al kura saba hoyan tawan alya bereya saba yirde biŋ yade mel goyen bana bipti forok irde hiyen al goyen mata gobe bada hawa ineŋ utaŋ irayiŋ. Goyenbe merege ma nurkeb sopte inayiŋ. Gwaha irayiŋ gega, go ma nurkeb okohom po tubul tiyayiŋ. ¹¹Al gwahade gote dufaymiŋbe bulun hitiŋ, irde mata bulunmiŋ gore po al gobe bulun gwahade yeŋ kawan irde hi gobe nurde hayen gogo.

Taitusbe Pol kuŋ kinyeŋ

¹²Be, nebe makan bulun heŋ heŋ natureb Nikopolis taunde kuŋ gor heŋ yeŋ nurde hime. Niŋgeb Atemas daw ma Tikikus wet kura teŋ kermeke kuŋ momoŋ girkeb makan igiŋ hiya gayenter aran po ne hitte wan wan niŋ kurut wor po yawayiŋ. ¹³Be, Apolosya Roma gabmanyen merere huwarde mere nurde sope ird ird meten teŋ teŋ al Senasyabe geya gor har. Goyenbe irem goyen naŋa hoyande kura kure yeke yeneŋbe keŋkela po faran yurayiŋ. Det goke kura nuriryen gobe tumnan yade yunayiŋ. ¹⁴Irdeb nende alya bereya goyen saba yirde hike hugineŋ mata igiŋ po teŋ teŋ niŋ kurut yeŋ hinayiŋ. Kurut yeŋ heŋyabe al kura beleŋ det niŋ amu heŋ hike yeneŋbe faran yurde hinayiŋ. Mali po gwaha kura tihit miŋmoŋ teŋ titmiŋeŋ ma teŋ hinayiŋ.

¹⁵Be, al neya hite mar gare ge niŋ dufay heŋ han goke momoŋ irayiŋ ninkeb gago momoŋ girde hime. Neŋ beleŋ gor niŋ al Yesu niŋ dufaymiŋ tareŋ irde neŋ ge amanen nurde han mar goke dufay heŋ hite goke momoŋ yirayiŋ.

Al Kurun beleŋ den kurun goyen buniŋeŋ dirde igiŋ igiŋ dirwon yeŋ gusunan irde hime. Gogo po.